



Samband sveitarfélaga á Austurlandi

Fundargerð 47. aðalfundar SSA, haldinn í Kirkju- og menningarmiðstöðinni Eskifirði í Fjarðabyggð dagana 13. og 14. september 2013

Föstudagur 13. september 2013

Dagskrá fundarins lá frammi og er hún þingskjal nr. 1.

1. Fundarsetning

Valdimar O. Hermannsson, formaður SSA, setti aðalfundinn kl. 10:20 og bauð fundarmenn velkomna á fertugasta og sjöunda aðalfund sambandsins.

Að loknum inngangi gerði formaður tillögu um Einar Má Sigurðarson og Þorberg Hauksson sem fundarstjóra og Gunnlaug Sverrisson og Helgu Guðrúnu Jónasdóttur sem fundarritara.

Tillögur samþykktar samhljóða. Fundarstjórar tóku síðan við stjórn fundarins og buðu fundarmenn velkomna til Fjarðabyggðar.

2. Kosningar

Fundarstjóri bar upp tillögu um eftirtalda í Nefndanefnd:

Páll Baldursson formaður, Eydis Ásbjörndóttir og Stefán Bogi Sveinsson.

Samþykkt samhljóða.

Fundarstjóri bar upp tillögu um eftirtalda í kjör- og kjörbréfanefnd:

Arnbjörg Sveinsdóttir formaður, Jón Björn Hákonarson og Sigríður E. Konráðsdóttir.

Samþykkt samhljóða.

3. Skýrsla stjórnar

Valdimar O. Hermannsson fór yfir skýrslu stjórnar starfsárið 2012 – 2013.

Skýrslan fylgir fundargögnum sem þingskjal nr. 2. Vísað til allsherjarnefndar.

4. Reikningar SSA

Ólafur Áki Ragnarsson kynnti reikninga SSA fyrir árið 2012, endurskoðaða fjárhagsáætlun 2013 ásamt fjárhagsáætlun fyrir árið 2014.

Greinargerð með ársreikningi 2012 - þingskjal nr. 3.

Ársreikningur SSA 2012 - þingskjal nr. 4.

Fjárhagsáætlun 2014 - þingskjal nr. 5.

Ársreikningi, greinargerð og fjárhagsáætlun vísað til fjárhagsnefndar. Ólafur Áki minnti á að skýrslur eftirtalinna stofnana hefðu verið lagðar fram í gögnum fundarmanna og verði vísað til viðeigandi starfsnefnda á fundinum.

5. Skýrslur stofnana

Skýrslur stofnana sem tengjast SSA eru ekki lagðar fram á fundinum, en þær er að finna á heimasíðu SSA, www.ssa.is

6. Ársskýrsla aðalfundar 2012

Ársskýrsla liggur frammi á fundinum.

7. Fyrirspurnir og umræður

Fundarstjóri gaf orðið laust um skýrslu stjórnar, ársreikning og fjárhagsáætlun.

Enginn kvaddi sér hljóðs.

8. Tillögur frá stjórn og fulltrúum til aðalfundar

8.1. Páll Björgvin Guðmundsson mælti fyrir tillögum stjórnar til meðferðar í allsherjar- og samstarfsnefnd. Þingskjal nr. 6

- a) Ályktun um málefni aldraðra
- b) Ályktun um verkaskiptingu heilbrigðiseftirlits sveitarfélaga og eftirlitsstofnana á vegum ríkisins
- c) Ályktun um heilbrigðisþjónustu
- d) Ályktun um samskipti ríkis og sveitarfélaga
- e) Ályktun um þjónustu ríkisstofnana

8.2. Sigrún Blöndal mælti fyrir tillögum til stjórnar til meðferðar í mennta- og menningarmálanefnd. Þingskjal nr. 7

- a) Ályktun um leik-, grunn- og tónlistarskóla auk Skólaskrifstofu Austurlands
- b) Ályktun um menntun á framhaldsskólastigi á Austurlandi
- c) Ályktun um háskólamenntun og rannsóknir á Austurlandi
- d) Ályktun um úttekt á skólamálum
- e) Ályktun um svæðisútvarp RÚV á Austurlandi
- f) Ályktun um menningarsamninga
- g) Ályktun um menningarmiðstöðvar
- h) Ályktun um skipan og starfssvið Menningarráðs
- i) Ályktun um Make by Þorpið
- j) Ályktun um menningarmál
- k) Ályktun um varðveislu menningarminja

8.3. Vilhjálmur Jónsson mælti fyrir tillögum stjórnar til meðferðar í byggða- og atvinnumálanefnd. Þingskjal nr. 8

- a) Ályktun um nýtt Austurkjördæmi
- b) Ályktun um sérstakan suðning við jaðarbyggðir á starfssvæði SSA
- c) Ályktun um fjölgun starfa á vegum ríkisins á Austurlandi
- d) Ályktun um nytjaskógrækt
- e) Ályktun um jöfnun á dreifingarkostnaði raforku
- f) Ályktun um verktakastarfsemi á Austurlandi
- g) Ályktun um framlag til ferðamála og upplýsingamiðstöðva
- h) Ályktun um refa- og minkaveiðar
- i) Ályktun um stjórn hreindýraveiða
- j) Ályktun um skatta á raforkuframleiðslu
- k) Ályktun um sjávarútvegsmál

8.4. Gunnþórunn Ingólfssdóttir mælti fyrir tillögum stjórnar til meðferðar í samgöngu- og umhverfisnefnd. Þingskjal nr. 9

- a) Ályktun um jarðgangagerð
- b) Ályktun um nýframkvæmdir í vegagerð
- c) Ályktun um viðhald vega
- d) Ályktun um brýr
- e) Ályktun um almenningssamgöngur
- f) Ályktun um Egilsstaðaflugvöll
- g) Ályktun um innanlandsflug
- h) Ályktun um hafnir
- i) Ályktun um skemmtiferðaskip og ferjur
- j) Ályktun um fjarskipti
- k) Ályktun um fráveitumál
- l) Ályktun um lífrænan úrgang
- m) Ályktun um náttúruverndarnefndir
- n) Ályktun um stuðning við uppbyggingu á friðlýstum svæðum
- o) Ályktun um uppbyggingu á nýjum háspennumöstrum / raflínum

**8.5. Stefán Bogi Sveinsson mælti fyrir tillögum stjórnar til meðferðar í laganefnd.
Þingskjal nr. 10**

- a) Drög að breytingum á samþykktum SSA.
- b) Drög að samþykktum fyrir nýjan Atvinnuþróunarsjóð Austurlands
- c) Erindisbréf samgöngunefndar SSA
- d) Erindisbréf samstarfsnefndar SSA

Fundarstjóri bað fundinum kveðju frá Sambandi íslenskra sveitarfélaga

Jens Garðar Helgason gerði grein fyrir og las greinargerð er fylgir með ályktun um nýtt Austurkjördæmi. (sjá þingskjal nr. 8 a))

9. Ávörp gesta

**9.1. Sigmundur Davíð Gunnlaugsson forsætisráðherra og fyrsti þingmaður
Norðausturkjördæmis**

Sigmundur ræddi í ávarpi sínu m.a. framkvæmdir við Norðfjarðargöng, íbúðþróun, breytta stjórnskipan og samvinnu sveitarfélaga, nýja byggðáætlun og landshlutaáætlanir.

9.2. Stefanía Traustadóttir sérfræðingur í innanríkisráðuneytinu

Stefanía bað fundinum kveðju Hönnu Birnu Kristjánsdóttur innanríkisráðherra og Ragnhildar Hjaltadóttur ráðuneytisstjóra.

Stefanía ræddi í ávarpi sínu m.a. sóknaráætlun landshluta, frumvarp um breytingar á lögum um tekjustofna sveitarfélaga og fyrirhugaðar breytingar á umdæmum sýslumanna.

9.3. Umræður og fyrirspurnir

9.3.1. Stefán Bogi Sveinsson ræddi sóknaráætlanir landshluta, samstarf ráðuneyta og mikilvægi þess að fjármunir fylgi með verkefnum frá ríki til sveitarfélaga.

9.3.2. Arnbjörg Sveinsdóttir tók undir með Stefáni Boga um mikilvægi þess að verkefnum sem koma frá ráðuneytinum fylgi tími og peningar.

9.3.3. Jón Björn Hákonarson forseti bæjarstjórnar Fjarðabyggðar bauð fundarmenn velkomna til Fjarðabyggðar og fór yfir dagskrá dagsins.

9.3.4. Steingrímur J. Sigfússon ræddi samstarf í landshlutum og tillögu um að endurvekja gamla Austurlandskjördæmið.

9.3.5. Héðinn Unnsteinsson frá forsætisráðuneytinu ræddi um sóknaráætlun landshluta.

9.3.6. Jens Garðar Helgason ræddi tillögu um að endurvekja gamla Austurlandskjördæmið.

9.3.7. Gunnar Jónsson ræddi tillögu um að endurvekja gamla Austurlandskjördæmið.

9.3.8. Kristján L. Möller ræddi tillögu um að endurvekja gamla Austurlandskjördæmið og Norðfjarðargöng.

9.3.9. Valdimar O. Hermannsson þakkaði ávörp og umræður.

Fundarhlé og hádegisverður frá kl. 12:15 – 13:15

10. Af hverju Austurland?

10.1. Björg Björnsdóttir – starfsmaður Austurbrúar

Björg fjallaði um búsetu á Austurlandi og landsbyggðinni versus búsetu á höfuðborgarsvæðinu.

10.2. Gylfi Arnbjörnsson – framkvæmdastjóri ASÍ

Gylfi fjallaði um atvinnu- og menntamál. Gylfi ræddi m.a. styttingu náms til stúdentsprófs, eflingu iðnnáms, ábyrgð fyrirtækja á þjálfun starfsmanna og þörf á auknum sveigjanleika menntakerfisins. Gylfi telur að námsstyrkir fari of mikið til náms á háskólastigi og auka þurfi styrki til starfs- og verknáms.

10.3. Umræður og fyrirspurnir

10.3.1. Stefán Bogi Sveinsson – Stefán benti á mikilvægi þess að hætta að tala um að efla verk- og tæknimenntun en láta þess í stað verkin tala og byrja að efla verk- og tæknimenntun. Stefán benti á að Færeyingar væru að þjónusta olúiðnaðinn þrátt fyrir að vera ekki olíuþjóð. Af hverju eru Íslendingar ekki að sinna þjónustu við olúiðnaðinn líkt og Færeyingar ?

10.3.2. Jón Björn Hákonarson – Efling iðn- og tæknimenntunar. Samfélagið þarf að hætta að tala iðn- og tæknimenntun niður. Sveitarfélög, fyrirtæki og verkalýðshreyfingin þurfa að taka höndum saman og breyta þessu.

10.3.3. Gylfi Arnbjörnsson – Benti á tækifæri sem ættu að felast í umframorku Kárahnjúkavirkjunar sem og mikilvægi þess að nýta þessa orku til atvinnuuppbyggingar á Austurlandi.

10.3.4. Jens Garðar Helgason – Benti á að innan framhaldsskólanna séu starfsmenn sem dagað hafi þar uppi og dragi niður starf og gæði kennslu í skólunum. Er of mikil áhersla á bóklegt nám í iðnnámi ?

10.3.5. Sigrún Blöndal – Ræddi kynningarmál framhaldsskólanna. Eru skólarnir á Austurlandi að sinna nægjanlega kynningu til barna sem búa e.t.v. ekki í alveg í næsta nágrenni við skólana ?

10.3.6. Valgerður Gunnarsdóttir – Ræddi skort á fjármagni í skólakerfinu og skort á samstarfi atvinnulífsins við skólakerfið. Atvinnulífið þyrfti að koma meira að því að segja til um framboð náms í skólunum og komi jafnframt að fjárhagslegum rekstri skólanna. Valgerður hvatti sveitarstjórnarmenn til að vera í sambandi við þingmenn og sérstaklega að upplýsa nýja þingmenn um málefni kjördæmisins.

10.3.7. Vilhjálmur Jónsson – Ræddi stofnun skóla á Lýðháskólastigi á Seyðisfirði og kallaði eftri stuðningi við verkefnið.

10.3.8. Gylfi Arnbjörnsson – Ræddi stuttlega málefni Lýðháskóla, gerði grein fyrir vandræðum við stofnun slíks skóla á árum áður en lýsti jafnframt yfir að hann væri hlynntur starfsemi slíks skóla.

11. Kynning á Austurbrú

11.1. Karl Sölvi Guðmundsson – framkvæmdastjóri

Karl kynnti starfsemi og þjónustu Austurbrúar, skipurit, auk vinnu sem farið hefur fram á síðustu mánuðum við stefnumótun stofnunarinnar. .

12. Umræður á borðum

Fulltrúum var skipt í sex hópa og skipaður hópstjóri með hverjum hópi. Fulltrúar sviða Austurbrúar fóru á milli borða og hver fulltrúi var 15 mínútur á hverju borði.

Hópstjóri frá hverjum hóp fór yfir það sem fram kom í hópavinnu.

13. Álit kjör- og kjörbréfanefndar

Formaður kjör- og kjörbréfanefndar, Arnbjörg Sveinsdóttir, kynnti niðurstöðu nefndarinnar. Þingskjal nr. 11.

Kjörnir fulltrúar eru sem hér greinir:

Fulltrúar sveitarfélaganna með seturétt á 47. aðalfundi SSA:

Fjarðabyggð

Valdimar O. Hermannsson
Guðmundur Þorgrímsson
(Helga Guðrún Jónasdóttir laugardag)
Stefán Már Guðmundsson
Eydís Ásbjörnsdóttir
Gunnar Jónsson
(Guðlaug Dana Andrésdóttir laugardag)

Ævar Ármannsson
Jens Garðar Helgason
Ásta Kristín Sigurjónsdóttir
Jón Björn Hákonarson
Eiður Ragnarsson
Jósef Auðunn Friðriksson
Elvar Jónsson
Sævar Guðjónsson
Páll Björgvin Guðmundsson
14

Fljótshálfshérað

Björn Ingimarsson
Gunnar Jónsson
Stefán Bogi Sveinsson
Ragnhildur Rós Indriðadóttir
Árni Kristinsson
Páll Sigvaldason
Guðlaugur Sæbjörnsson
Eyrún Arnardóttir
Karl Lauritzon
Sigrún Harðardóttir
Sigrún Blöndal
11

14. Álit nefndanefndar

Páll Baldursson formaður nefndanefndar lagði fram tillögu nefndarinnar í þingskjali nr. 12.

Laganefnd

Stefán Bogi Sveinsson formaður
Guðmundur Þorgrímsson
Þórunn Egilsdóttir

Seyðisfjarðarkaupstaður

Vilhjálmur Jónsson
Guðrún Katrín Árnadóttir
Daníel Björnsson
3

Vopnafjarðarhreppur

Sigríður Elva Konráðsdóttir
Bárður Jónasson
Björn Hreinsson
3

Djúpavogshreppur

Andrés Skúlason
Gauti Jóhannesson
2

Borgarfjarðarhreppur

Jakob Sigurðsson
1

Breiðdalsvík

Páll Baldursson
1

Fljótshálfshreppur

Gunnþórunn Ingólfssdóttir
1

Samtals fulltrúar 36

Fjárhagsnefnd

Þorsteinn Steinsson formaður
Guðlaugur Sæbjörnsson
Gunnar Jónsson (Fjarðabyggð)

Allsherjar- og samstarfsnefnd

Páll Björgvin Guðmundsson formaður
Ragnhildur Rós Indriðadóttir
Sigrún Harðardóttir
Eiður Ragnarsson
Stefán Már Guðmundsson
Páll Baldursson

Byggða- og atvinnumálanefnd

Vilhjálmur Jónsson formaður
Páll Sigvaldason
Karl Lauritzson
Ásta Kristín Sigurjónsdóttir
Sævar Guðjónsson
Gauti Jóhannesson

Umhverfis- og samgöngunefnd

Gunnþórunn Ingólfssdóttir formaður
Gunnar Jónsson (Fljótshálsa)
Eyrún Arnardóttir
Jón Björn Hákonarson
Jens Garðar Helgason
Elvar Jónsson
Andrés Skúlason
Daníel Björnsson
Jakob Sigurðsson
Bárður Jónasson

Mennta- og menningarmálanefnd

Sigrún Blöndal formaður
Björn Ingimarsson
Árni Kristinsson
Jósef Auðunn Friðriksson
Ævar Ármannsson
Eydís Ásbjörnsdóttir
Guðrún Katrín Árnadóttir
Björn Hreinsson
Jón Þórðarson

Fundi frestað fram til kl. 09:00 laugardaginn 14. september.

Fundi fram haldið 14. september kl. 09:00 með nefndarstörfum.

Dagskrá framhaldið kl. 11:00 með fyrirlestrum.

15. Hvernig löðum við fleiri íbúa að ?

- 15.1. Þóroddur Bjarnason – stjórnarformaður Byggðastofnunar
Þóroddur ræddi stefnumótandi byggðaáætlun 2010 – 2013 og heildstæða byggðastefnu 2014 – 2017, atvinnu og nýsköpun, atvinnuleysi, heilbrigðismál og útgjöld til málaflokka.

47. aðalfundur SSA haldinn í Fjarðabyggð 13. og 14. september 2013

Mikið hefur breyst á Austurlandi í atvinnumálum á síðustu árum. Í máli Þórodds kom fram að þau svæði á landsbyggðinni sem eru í mestri hættu á að leggjast af, séu Vestfirðir og hluti af Vesturlandi, Norðurausturhornið og Suðausturhornið. Þóroddur fór m.a. yfir þróun þéttbýlis á Austurlandi og þróun stærri byggðarkjarna á Austurlandi.

15.2. Janne Sigurðsson – forstjóri Alcoa Fjarðaáls

Janne ræddi starfsmannamál álvers Alcoa Fjarðaáls vítt og breytt og fór m.a. yfir störf, fjölskylduhagi, aðstæður og búsetu nokkurra starfsmanna.

15.3. Umræður og fyrirspurnir

15.3.1. Þorsteinn Steinsson – Þörf er á sértækum aðgerðum fyrir jaðarbyggðir.

15.3.2. Jens Garðar Helgason – Bar lof á starfsemi Alcoa í samfélaginu. Sóknarfæri liggja í öfluglu atvinnulífi. Lýsti yfir ánægju með þá framtíðarsýn sem kom fram í máli Þórodds Bjarnasonar.

15.3.3. Arnbjörg Sveinsdóttir – Flug er eina alvöru samgöngubótin fyrir Austfirðinga, af hverju er ekki hægt að niðurgreiða flugsamgöngur með sama hætti og samgöngur á landi ?

15.3.4. Valdimar O. Hermannsson – Velti fyrir sér framtíð og stöðu Byggðastofnunar og samráðsvettvangi sveitarfélaga.

15.3.5. Jón Þórðarson – Íbúafjöldi á Borgarfirði eystri hefur ekkert breyst í hundruð ára og ekkert sem bendir til að byggð muni leggjast af næstu hundrað árin, þrátt fyrir að m.a. sé búið að taka heilbrigðisþjónustu af þorpinu.

15.3.6. Þóroddur og Janne svöruðu fyrirspurnum.

Hádegisverður 12:30 – 13:15

16. Fjárhagsnefnd

Þorsteinn Steinsson hópstjóri flutti framsögu. Þingskjal nr. 13

Álit Fjárhagsnefndar aðalfundar SSA 2013.

Þorsteinn Steinsson, hópstjóri. Með Þorsteini í nefndinni voru Guðlaugur Sæbjörnsson, Gunnar Jónsson og Guðlaug Dana Andrésdóttir.

Til nefndarinnar var vísað ársreikningi SSA fyrir árið 2012, fjárhagsáætlun SSA fyrir árið 2014 og endurskoðaðri fjárhagsáætlun fyrir 2013.

Á fund nefndarinnar mættu einnig Karl Sölvi Guðmundsson, framkvæmdastjóri og Ólafur Áki, sem svöruðu fyrirspurnum nefndarmanna.

Álit Fjárhagsnefndar á aðalfundi SSA 2013

16.1. Ársreikningur 2012

Nefndin fór yfir reikninginn og þá greinargerð sem með honum fylgdi. Samkvæmt honum er rekstrarafkoma af reglulegri starfsemi tæplega 0,6 m.kr. en var áætluð 5,7 m.kr.

Í heild má segja að árið 2012 einkennist nokkuð af því að Austurbrú er að leggja úr vör. Áhrifa þess gætir bæði tekju -og gjalda megin. Heildartekjur urðu þannig 91,5 m.kr. en voru áætlaðar 78,3 m.kr. Þessi munur skýrist að mestu vegna framlags v/AST að fjárhæð 12 m.kr. Heildargjöld af reglulegri starfsemi voru á hinn vænginn 91,8 m.kr. en voru áætluð 73,5 m.kr. Munar því þarna 18, 3 m.kr., sem að mestu skýrist á því að aukinn kostnaður var vegna vinnu við að koma Austurbrú á koppinn.

Launakostnaður var til að mynda mun meiri en áætlað hafði verið af þessum sökum.

Lífeyrisskuldbindingar hækkuðu um 2,5 m.kr. milli ára. Rétt er einnig að geta þess sérstaklega að tekjur og gjöld vegna almenningssamgangna á svæðinu eru færðar upp í þessum reikningi og er um 4,4 m.kr., sem útgjöld fara framyfir framlög á þessum lið. Þennan kostnað þarf að sækja til ríkisins. Rétt er einnig að geta þess að leggja þurfti út 7,0 m.kr. lögbannskröfu í tengslum við málaferli vegna

47. aðalfundur SSA haldinn í Fjarðabyggð 13. og 14. september 2013

almenningsgangna. Sú fjárhæð á að endurheimtast, þegar þeim málaferlum lýkur. Umframkostnaður þessi er brúaður með handbæru fé, sem var 24,5 m.kr. í upphafi árs en lækkar um 14,2 m.kr. og er því í árslok 10,3.

Við yfirferð fjárhagsnefndar á ársreikningnum kom í ljós villa í sjóðstreymi ársreikningsins þannig að handbært fé í árslok var talið vera 25,3 m.kr. en á að vera 10,3 m.kr.eins og fram hefur komið. Nýju sjóðstreymisýfirliti með leiðréttum tölum hefur verið dreift á fundinum. Nefndin vill einnig beina því til stjórnar SSA að fjárhagsleg samskipti milli SSA og Austurbrúar verði aðgreind með skýrari hætti og leggur til að gerður verði, svo fljótt sem kostur er, samningur milli þessara aðila.

Fjárhagsnefnd telur sig hafa fengið eðlilegar skýringar á frávikum milli ársreiknings og áætlunar.

Fjárhagsnefnd leggur til að reikningurinn verði samþykktur með áorðnum breytingum sem fram koma í leiðréttu sjóðstreymisýfirliti og ítrekar ábendingu sína um gerð samnings um fjárhagsleg samskipti milli aðila.

16.2. Endurskoðuð fjárhagsáætlun 2013

Fjárhagsnefnd fór yfir endurskoðaða áætlun 2013. Nefndin leggur áherslu á að leitast verði við að framlög vegna almenningsgangna dugi fyrir útlögðum kostnaði vegna þeirra.

Fjárhagsnefnd leggur til að endurskoðuð áætlun 2013 verði samþykkt.

16.3. Fjárhagsáætlun 2014

Fjárhagsnefnd fór yfir fjárhagsáætlun 2014. Nefndin telur ekki ástæðu til þess að gera neinar breytingar á áætluninni, en vill þó sérstaklega benda á að mikilvægt sé að kostnaður vegna almenningsgangna verði allur brúaður með framlagi frá ríki þ.a. SSA þurfi ekki að bera árlegan halla af þessum rekstri. Í áætluninni eru áætluð framlög vegna þessa þáttar 48,0 m.kr. en útgjöld 50,3 m.kr.

Fjárhagsnefnd leggur til að fjárhagsáætlun 2014 verði samþykkt eins og hún liggur fyrir.

Enginn tók til máls.

Þingskjal nr. 13 var borið undir atkvæði í heild sinni og samþykkt samhljóða.

17. Allsherjar- og samstarfsnefnd **Páll Björgvin Guðmundsson flutti framsögu. Þingskjal nr. 14.**

Tillögur allsherjar- og samstarfsnefndar

17.1. Ályktun um málefni aldraðra

Aðalfundur SSA haldinn í Fjarðabyggð 13. og 14. september skorar á stjórnvöld og Samband íslenskra sveitarfélaga að undirbúa vel viðræður sín á milli um að sveitarfélögin taki yfir málefni aldraðra. Eftir að sveitarfélögin tóku yfir málefni fatlaðra er eðlilegt að nærþjónasta aldraðra í heimabyggð fari yfir til sveitarfélaganna enda fylgi honum eðlilegir tekjustofnar frá ríkisvaldinu. Málefni aldraðra verða sífellt umfangsmeiri í framtíðinni, öldruðum fer fjölgandi og er umsjón þess málaflokks best kominn í höndum sveitarfélaganna. Hér er um mikilvæga nærþjónustu að ræða, mikil skörun er í núverandi þjónustu og mikilvægt að þjónustan sé á einni hendi. Grundarvallaratriði er að nægt fjármagn fylgi umfanginu frá ríki til sveitarfélaga og kröfur um þjónustu séu kostnaðarmetnar fyrirfram.

17.2. Ályktun um verkaskiptingu heilbrigðiseftirlits sveitarfélaga og eftirlitsstofnana á vegum ríkisins

Aðalfundur SSA haldinn í Fjarðabyggð 13. og 14. september skorar á ríkisvaldið að marka þá stefnu að

47. aðalfundur SSA haldinn í Fjarðabyggð 13. og 14. september 2013

Umhverfisstofnun og Matvælastofnun, sem báðar eru m.a samræmingarstofnanir fyrir heilbrigðiseftirlit sveitarfélaganna verði breytt í stjórnsýslustofnanir og dregið úr eftirlitshlutverkum þeirra. Stofnunum verði gefið rými til að sinna samræmingarhlutverki, samskiptum við systurstofnanir í öðrum löndum og vinnu fyrir ráðuneytin. Stofnanirnar ættu að leiða vinnu við endurskoðun reglugerða, sem er orðið afar brýnt verkefni. Heilbrigðiseftirliti verði falið sem mest af eftirlitsverkefnum á grunni reglugerða og leiðbeininga sem unnar eru á grunni þeirra sem og reynslu sem þegar er fyrir hendi í eftirlitinu. Heilbrigðisfulltrúar eru sérfræðingar í eftirliti og geta á auðveldan og markvissan hátt sinnt eftirlitsverkefnum úr nærumhverfinu á hagkvæman hátt.

17.3. Ályktun um heilbrigðisþjónustu

Aðalfundur SSA haldinn í Fjarðabyggð 13. og 14. september skorar á yfirvöld velferðar- og fjármála, Alþingi og ríkisstjórn Íslands, að standa vörð um þá heilbrigðisþjónustu sem nú er veitt í fjórðungnum, og treysta rekstrargrunn hennar eftir langvarandi niðurskurð og hagræðingu. Þessi mikilvæga nærþjónusta er grundvöllur búsetu, atvinnustarfsemi og frekari atvinnuþbyggingar í fjórðungnum. Óásættanlegt er að þjónustan verði skert meira en orðið er enda munu slíkar skerðingar valda auknu öðryggi meðal íbúa og fyrirtækja á Austurlandi og veikja þannig búsetuskilyrði. Sýnt hefur verið fram á m.a. í faglegu mati að flutningur heilbrigðisþjónustu út úr fjórðungnum eykur kostnað skattgreiðanda. Heilbrigðisþjónusta í nærumhverfi er einn mikilvægasti grunnþáttur í þjónustu við íbúa, ekki síst á jaðarsvæðum þar sem samgöngur eru erfiðar og því verða stjórnvöld að taka tillit til þeirra staðhátta sem einkenna Austurland þegar framlög til heilbrigðismála eru ákveðin. Fundurinn varar sérstaklega við því að skert verði sú bráða-sérfræði- og fæðingþjónusta, sem nú er veitt í fjórðungnum. Íbúar alls Austurl

ands eiga skýlausan rétt samkvæmt núgildandi lögum, á ásættanlegu aðgengi að heilbrigðisþjónustu eins og aðrir landsmenn.

17.4. Ályktun um samskipti ríkis og sveitarfélaga við flutning verkefna frá ríki til sveitarfélaga

Aðalfundur SSA haldinn í Fjarðabyggð 13. og 14. september er fylgjandi auknum flutningi verkefna frá ríki til sveitarfélaga, eða landshlutasamtaka þeirra, sem betur eiga heima í nærumhverfi sveitarstjórnarstigsins, en krefst þess jafnframt að íþyngjandi skilyrðum af hálfu ríkisvaldsins á hendur sveitarfélögum verði stillt í hof, og að þeim fylgi ávallt vandað kostnaðarmat og viðunandi tekjustofnar.

17.5. Ályktun um þjónustu ríkisstofnana

Aðalfundur SSA haldinn í Fjarðabyggð 13. og 14. september leggur áherslu á að stjórnvöld nýti betur þann mannaauð og aðstöðu sem til staðar er í fjórðungnum í stað þess að senda starfsmenn með ærnum tilkostnaði frá höfuðstöðvum stofnana á höfuðborgarsvæðinu. Staðbundnar stofnanir eins og sýslumannsembætti og heilbrigðiseftirlit, svo dæmi sé tekin, eru vel til þess fallnar að sinna verkefnum við tollgæslu, matvælaeftirlit og fleira sem nú er verið að senda fólk landshluta á milli til þess að sinna.

17.6. Ályktun um samstarf

Aðalfundur SSA haldinn í Fjarðabyggð 13. og 14. september fagnar þeim verkefnum sem unnin eru í samstarfi sveitarfélaga á Austurlandi. Má þar nefna samstarf á sviðum félagsþjónustu, í málefnum fatlaðra, rekstur skólaskrifstofu og Austurbrúar. Mikilvægt er að sveitarfélögin haldi áfram að leita leiða til að auka samstarf á ýmsum sviðum, íbúum fjórðungsins til hagsbóta.

Enginn tók til máls.

Þingskjal nr. 14 var borið undir atkvæði í heild sinni og samþykkt samhljóða.

18. Mennta- og menningarmálanefnd **Sigrún Blöndal formaður flutti framsögu. Þingskjal nr. 15.**

Tillögur mennta- og menningarmálanefndar

18.1. Ályktun um úttekt á skólamálum á Austurlandi

47. aðalfundur SSA haldinn í Fjarðabyggð 13. og 14. september leggur til að gerð verði allsherjar úttekt á skólamálum í fjórðungnum. Tilgangur hennar væri að fá betri mynd af stöðu skólamála til að hægt sé að marka stefnu til lengri tíma. Reikna mætti með að slík úttekt tæki allt að tvö ár enda tæki hún yfir vítt svið menntunar og rannsókna.

18.2. Ályktun um leik-, grunn- og tónlistarskóla

47. aðalfundur SSA í Fjarðabyggð 13. – 14. september 2013 áréttar að gott starf í leik- og grunnskólum er lykilatriði til að samfélög geti þrífist og dafnað. Mikilvægt er að samstaða og stuðningur sé í samfélaginu um það. Aðalfundur SSA hvetur starfsmenn og stjórnendur leik- og grunnskóla í fjórðungnum til aukins faglegs samstarfs með það fyrir augum að efla skólastarf. Sömuleiðis hvetur aðalfundurinn til þess að tónlistarskólar auki samstarf sitt því þannig má styrkja fjölbreytt námsframboð og að nemendur fái kennslu samkvæmt námskrá.

18.3. Ályktun um menntun á framhaldsskólastigi á Austurlandi

47. aðalfundur SSA haldinn í Fjarðabyggð 13. og 14. september 2013 hvetur stjórnvöld til að stuðla að bættri aðstöðu til framhaldsskólanáms á Austurlandi. Mikilvægt er að austfirskum ungmennum bjóðist fjölbreytt nám sem stenst samanburð við það besta sem gerist. Þá er ekki síður mikilvægt að á Austurlandi sé boðið uppá nám sem tengist þeim fjölbreyttu framtíðarmöguleikum sem svæðið býður upp á. Fundurinn hvetur til aukins samstarfs framhaldsskóla með það að markmiði meðal annars að auka námsframboð.

18.4. Ályktun um háskólamenntun og rannsóknir á Austurlandi

47. aðalfundur SSA í Fjarðabyggð 13. – 14. september 2013 vekur athygli á að í skýrslu Þóroddar Bjarnasonar og Jóns Þorvaldar Heiðarssonar „Skatttekjur og ríkisútgjöld í Norðausturkjördæmi“ kemur fram að verulega hallar á Austurland í háskóla og rannsóknastarfsemi á vegum ríkisins eða 500 milljónum. Afleiðing þessa er að a.m.k. 50 ársverk í þessum geira eru unnin annars staðar á landinu á kostnað Austfirðinga.

Þetta veldur því einnig að meirihluti austfirska ungmenna verður að sækja háskólamenntun annað og á ekki kost á vinnu við rannsóknir og önnur fræðastörf á heimaslóð. Með þessari mismunun er tryggt að stór hluti hvers árgangs austfirska ungmenna setjist að utan fjórðungs að loknu námi. Skorað er á stjórn SSA að fylgja málinu eftir.

18.5. Ályktun um fjarnám

47. aðalfundur SSA í Fjarðabyggð 13. – 14. september 2013 skorar á háskólastigið að móta sér stefnu varðandi fjarnám.

18.6. Ályktun um svæðisútvarp RÚV á Austurlandi

47. aðalfundur SSA haldinn í Fjarðabyggð 13. og 14. september 2013 skorar á RÚV ohf. að koma aftur á svæðisútvarpi á Austurlandi og styrkja fréttapjónustu í fjórðungnum svo tryggja megir sem best þáttagerð af svæðinu og síðast en ekki síst hlutlausan og vandaðan fréttaflutning.

18.7. Ályktun um menningarsamninga

47. aðalfundur SSA haldinn í Fjarðabyggð 13. og 14. september 2013 áréttar mikilvægi þess að tryggja þá stöðu gagnvart ríkisvaldinu sem Austurland hefur náð varðandi menningarsamninga. Mikilvægt er því að slaka ekki á kröfum varðandi reiknireglu við skiptingu fjármagns í menningarsamningum. Með þessu móti verður fast fjármagn til menningarmála á svæðinu best tryggt til framtíðar.

18.8. Ályktun um menningarmiðstöðvar

47. aðalfundur SSA haldinn í Fjarðabyggð 13. og 14. september 2013 ítrekar mikilvægi þess að

47. aðalfundur SSA haldinn í Fjarðabyggð 13. og 14. september 2013

fjármagni verði áfram veitt til menningarmiðstöðva í gegnum menningarsamning á starfsvæði SSA. Mikilvægt er að sækja meiri fjármuni til ríkisvaldsins í gegnum menningarsamninga þar sem hlutfallslega hefur dregið úr framlagi ríkisins í þessum eignum á sama tíma og sveitarfélögin hafa aukið sinn hlut.

18.9. Ályktun um menningarmál

47. aðalfundur SSA haldinn í Fjarðabyggð 13. og 14. september 2013 leggur til við Austurbrú sem enn er í mótun að þar verði ekki tekin of stór skref er varðar ákvarðanir og breytingar sem snerta menningarmál í fjórðungnum, s.s. skipan Menningarráðs og verkefni þess. Því er mikilvægt að hafa víðtækt og gott samráð um þennan málaflokk eins og aðra. Mikilvægast á þessum tímamótum er því að treysta þann grunn sem mótaður hefur verið um málaflokkinn og byggja svo ofan á hann í markvissum skrefum.

18.10. Ályktun um varðveislu menningarminja

47. aðalfundur SSA haldinn í Fjarðabyggð 13. og 14. september 2013 hvetur sveitarstjórnarfólk og aðra viðkomandi til að huga almennt betur að menningarverðmætum í héraði og reyna að tryggja sem best að mikilvægum menningarminjum verði ekki raskað. Menningartengd ferðaþjónusta er mjög vaxandi í fjórðungnum og eru mikilvæg menningarverðmæti eins og endurgerð og vernd gamalla húsa meðal annars mjög þýðingarmikill þáttur í uppbyggingu þessarar vaxandi atvinnugreinar.

Vísað til Byggða- og atvinnumálanefndar

18.11. Ályktun um Make by Þorpið

47. aðalfundur SSA haldinn í Fjarðabyggð 13. og 14. september 2013 áréttar mikilvægi þess að Austurbrú styðji áfram við verkefnið Make by Þorpið og haldi áfram að efla það mikilvæga starf sem þar hefur verið unnið. Mikilvægt er að ekki glatist árangur, þekking og tengslanet sem aflað hefur verið í gegnum verkefnið.

Enginn tók til máls.

Þingskjal nr. 15 var borið undir atkvæði í heild sinni og samþykkt samhljóða.

19. Byggða- og atvinnumálanefnd

Vilhjálmur Jónsson flutti framsögu. Þingskjal nr. 16.

Tillögur byggða- og atvinnumálanefndar

19.1. Ályktun um nýtt Austurkjördæmi

Aðalfundur SSA haldinn í Fjarðabyggð 13. – 14. sept 2013 leggur til við íslensk stjórnvöld að núverandi Norðausturkjördæmi verði skipt upp og að til verði nýtt Austurkjördæmi sem næði yfir núverandi starfssvæði SSA, frá Vopnafirði til Djúpavogs. Aðalfundur SSA beinir því til stjórnvalda að skoða þann möguleika að láta íbúa kjördæmisins kjósa um tillögu að slíkri breytingu samhliða komandi sveitarstjórnarkosningum.

19.2. Ályktun um sérstakan stuðning við jaðarbyggðir á starfssvæði SSA

Aðalfundur SSA haldinn í Fjarðabyggð 13. – 14. september 2013 beinir því til stjórnvalda að tryggja framtíðar grunnþjónustu við íbúa hinna dreifðu byggða á svæðinu. Jafnframt standi SSA sameinað að baki þeim svæðum sem lengst þurfa að sækja þjónustu og haldi áfram að berjast fyrir bættum samgöngum inn á miðsvæðið. Jafnframt er ljóst að ákveðnar byggðir eiga við meiri erfiðleika að etja en aðrar og því þarf að gera úttekt og móta tillögur um hvernig mæta megir viðvarandi vanda þeirra sem fylgt verði eftir með markvissri aðgerðaáætlun og fjármagni.

19.3. Ályktun um fjölgun starfa á vegum ríkisins á Austurlandi

Aðalfundur SSA haldinn í Fjarðabyggð 13. – 14. september 2013 leggur áherslu á að eitt af meginverkefnum SSA og Austurbrúar á næstu árum verði að færa fleiri opinber störf til Austurlands í samstarfi við ríkisvaldið. Fyrsti hluti verkefnisins, og þá um leið markmið komandi starfsárs, sé að amk. 30 störf komi inn í fjórðunginn og þeim verði fundinn staður sem víðast í fjórðungnum. Mikilvægt er í þessu samhengi að nýta þær breytingar í ríkisrekstri sem framundan eru, til þess að ná þessu markmiði og

47. aðalfundur SSA haldinn í Fjarðabyggð 13. og 14. september 2013

þá um leið hagkvæmari lausn fyrir hið opinbera.

19.4. Ályktun um nytjaskógrækt

Aðalfundur SSA haldinn í Fjarðabyggð 13. – 14. september 2013 skorar á Alþingi að veita auknum fjármunum til svæðisbundinna skógræktarverkefna til áframhaldandi uppbyggingar, þannig að unnt verði að sinna betur því mikilvæga verkefni að styðja við og þróa aðferðir við viðarnytjar og að tryggja stöðugleika atvinnugreinarinnar til lengri tíma. Á Austurlandi eru að vaxa upp stór svæði klædd nytjaskógi sem munu til framtíðar litið geta skapað mikil verðmæti. Mikilvægt er að nú þegar verði fjármunum veitt í rannsóknir tengdum úrvinnslu og lögð verði áhersla á að úrvinnslustöð fyrir við rísi sem fyrst hér eystra.

19.5. Ályktun um jöfnun á dreifingarkostnaði raforku

Aðalfundur SSA haldinn í Fjarðabyggð 13. – 14. sept 2013 skorar á Alþingi að jafna að fullu raforkuverð til almennra nota í dreifbýli og í þéttbýli. Það er óásættanlegt að íbúum á dreifbýlli svæðum sé gert að greiða herra verð fyrir grunnþjónustu eins og raforku, einkum þegar horft er til þess að víða háttar svo til að auðlindir sem nýttar eru til raforkuframleiðslu er einmitt að finna á eða í nágrenni við þau dreifbýlu svæði.

19.6. Ályktun um fjárfestingaverkefni á Austurlandi

Aðalfundur SSA haldinn í Fjarðabyggð 13. – 14. sept 2013 hvetur stjórnvöld til þess að ráðast í fyrirbyggjandi mannaflafrek fjárfestingaverkefni á Austurlandi. Slík fjárfesting er til þess fallin að varðveita þá þekkingu og reynslu sem býr hjá verktökum á Austurlandi og efla þennan mikilvæga geira til að takast á við framtíðarverkefni.

19.7. Ályktun um framlag til ferðamála og upplýsingamiðstöðva

Aðalfundur SSA haldinn í Fjarðabyggð 13. – 14. sept 2013 hvetur stjórnvöld til að auka stuðning við uppbyggingu ferðaþjónustu og grunnstöðir hennar sem sannanlega hefur skilað árangri og skipt sköpum fyrir þessa atvinnugrein. Mikilvægt er að byggt verði á þeim góða árangri sem þegar hefur náðst og að markvisst verði unnið að því að dreifa auknum fjölda ferðamanna um landið allt. Liður í þeirri viðleitni er að markaðssetja Egilsstaðaflugvöll til erlendra flugfélaga sem valkost við Keflavíkflugvöll. Upplýsingamiðstöðvar eru afar mikilvægur þáttur í að fjölga áfangastöðum ferðamanna, vísa þeim leið og tryggja ánægjulega dvöl. Því skorar aðalfundur SSA á stjórnvöld að tryggja nægjanlegt fjármagn til upplýsingamiðstöðva á Austurlandi og að þeir fjármunir dugi til að þjónusta ferðamenn allt árið.

19.8. Ályktun um refa- og minkaveiðar

Aðalfundur SSA haldinn í Fjarðabyggð 13. – 14. september 2013 skorar á ríkisvaldið að leggja nægjanlegt fjármagn til sveitarfélaga vegna nauðsynlegra refa- og minkaveiða. Veiðarnar stuðla að því, að unnt sé meta og draga úr tjóni af völdum refa og minka og tryggja nauðsynlegt jafnvægi í lífríkinu. Ljóst er að kostnaður vegna veiðanna leggst mjög misþungt á sveitarfélög og oft fellur mikill kostnaður á fámenn en landstór sveitarfélög. Fundurinn leggur enn fremur til að tryggðar verði endurgreiðslur á virðisaukaskatti til sveitarfélaganna vegna veiðanna. Þá hvetur aðalfundur SSA til þess að stjórnvöld falli frá þeim skilmálum sem settir voru í fjárlög fyrir árið 2013 fyrir greiðslum til sveitarfélaganna og komið hafa í veg fyrir greiðslur til þeirra vegna refaveiða.

19.9. Ályktun um stjórn hreindýraveiða

Aðalfundur SSA haldinn í Fjarðabyggð 13. – 14. september 2013 hvetur umhverfis- og auðlindaráðherra til þess að hefja, í samráði við heimamenn, vinnu við nauðsynlegar lagabreytingar svo að umsýsla og stjórn hreindýraveiða verði í höndum stofnana á Austurlandi. Hreindýr eru auðlind sem fyrirfinnst aðeins á Austurlandi og því telur fundurinn eðlilegt að umsýsla og stjórnun sé staðsett í fjórðungnum. Jafnframt verði sveitarfélögum og hagsmunaaðilum á Austurlandi gert kleift að koma að mótun regluverks í málaflokknum þannig að veiðarnar geta skilað sem mestum arði fyrir austfirskt samfélag.

19.10. Ályktun um skatta á raforkuframleiðslu

Aðalfundur SSA haldinn í Fjarðabyggð 13. – 14. september 2013 telur að leggja eigi áherslu á að breyta skattkerfi orkuvinnslu í þá veru sem gerist í Noregi, en þar njóta sveitarfélög á áhrifasvæðum virkjana

beinna tekna af mannvirkjum og framleiðslu á raforku, sem enda upptaka með áhrifum sínum á tiltekin gæði sveitarfélaganna eftir atvikum. Fundurinn telur að slík breyting sé nauðsynlegur liður í því að hámarka þjóðararð af nýtingu náttúruauðlinda og jafnframt tryggja að þeir sem búa við neikvæð áhrif af virkjunum, hafi af þeim tekjur til að bæta fyrir þau neikvæðu áhrif sem virkjun hefur á landgæði.

19.11. Ályktun um sjávarútvegsmál

Aðalfundur SSA haldinn í Fjarðabyggð 13. – 14. september 2013 gerir þá kröfu til stjórnvalda að þau tryggi að ákvarðanir um stjórn og fyrirkomulag fiskveiða séu undirbúnar og teknar í fullu samráði við fulltrúa sjávarbyggða. Fundurinn skorar jafnhliða á stjórnvöld að móta ábyrga byggðastefnu svo hægt verði að skapa varanlega framtíðarsýn og sátt um grunnatvinnuvegi og auðlindanýtingu sem er forsenda byggðar í landinu.

19.12. Ályktun um sóknaráætlunaráform

Aðalfundur SSA haldinn í Fjarðabyggð 13. – 14. september 2013 skorar á stjórnvöld að fylgja eftir því starfi sem unnið hefur verið að undir merkjum sóknaráætlunar með langtíma framtíðarsýn að leiðarljósi og sveitarfélögin geta byggt stefnumörkun sína á. Jafnframt að stjórnvöld tryggi fjármagn til að fylgja áætlunum eftir. Í því sambandi verði ekki síst horft til auðlinda Ausurlands og áframvinnslu staðbundinna hráefna sem verða til í landshlutanum.

19.13. Ályktun um að styrkja dreifkefi raforku

Aðalfundur SSA haldinn í Fjarðabyggð 13. – 14. sept 2013 skorar á stjórnvöld að þau styrki flutningskerfi raforku sem ekki hefur staðið að fullu undir hlutverki sínu undanfarin ár og hefur sem dæmi óstöðugleiki háð starfsemi fyrirtækja á Austurlandi sem reiða sig á raforku við starfsemi sína.

Ályktun vísað frá mennta- og menningarnefnd til atvinnu- og byggðanefndar

18.11. Ályktun um Make by Þorpið

47. aðalfundur SSA haldinn í Fjarðabyggð 13. – 14. sept 2013 áréttar mikilvægi þess að Austurbrú styðji áfram við verkefnið Make by Þorpið og haldi áfram að efla það mikilvæga starf sem þar hefur verið unnið. Mikilvægt er að ekki glatist árangur, þekking og tengslanet sem aflað hefur verið í gegnum verkefnið.

Til máls tóku: Þorsteinn Steinsson og lagði til að ályktun 19.1. verði felld út, Jens Garðar Helgason lagði til að ályktun stæði óbreytt, Stefán Bogi Sveinsson lagði til að ályktun stæði óbreytt, Guðrún Katrín Árnadóttir, Valdimar O. Hermannsson lagði til að ályktun stæði óbreytt.

Þingskjal nr. 16 - ályktanir 19.2 til 19.13 og ályktun 18.11. samþykktar samhljóða.
Ályktun 19.1. samþykkt með meginþorra atkvæði - 7 á móti.

20. Laganefnd

Stefán Bogi Sveinsson hópstjóri flutti framsögu. Þingskjal nr. 17.

Tillögur laganefndar.

20.1. Ályktun um vinnu við breytingar á samþykktum SSA

Aðalfundur SSA haldinn í Fjarðabyggð 13. og 14. september 2013 felur stjórn SSA hefja þegar vinnu við heildarendurskoðun samþykktar SSA. Stjórn er falið að skipa vinnuhóp þriggja einstaklinga sem hafi þekkingu og reynslu af starfsemi SSA fyrr og nú til að gera tillögu að nýjum samþykktum. Fundurinn telur að meðal þess sem taka þurfi afstöðu til í starfshópnum séu eftirfarandi atriði:

- Hvort viðhalda eigi svæðaskiptingu SSA samkvæmt 2. gr. núgildandi samþykktum.
- Hvort halda eigi núgildandi fulltrúafyrirkomulagi á aðalfundi sbr. 6. gr. samþykktanna, eða hvort gera eigi ráð fyrir að allir kjörnir fulltrúar sveitarfélaganna sitji aðalfund.
- Hvort gera eigi breytingar á vægi atkvæða á aðalfundum frá því sem nú er sbr. 6. gr.
- Hvernig stjórn sambandsins skal skipuð sbr. 7. gr. núgildandi samþykktar.

- Hvernig formaður stjórnar er kjörinn og verkum innan stjórnar skipt að öðru leyti sbr. 8. gr. nógildandi samþykkt.
- Hvort kjósa beri skoðunarmenn reikninga sbr. 9. gr. nógildandi samþykkt.
- Hvernig ákvæði skulu vera um starfsmenn og daglega starfsemi SSA í ljósi tilurðar Austurbrúar.
- Hvernig aðildargjöld eru ákveðin, reiknuð út og greidd sbr. 11. gr. nógildandi samþykkt.

Starfshópurinn skal skila tillögum sínum til stjórnar fyrir 1. júní og stjórn skal leggja tillögur að breyttum samþykktum fyrir aðalfund SSA 2014 með lögmaletum fyrirvara.

20.2. Ályktun um nýjan atvinnuþróunarsjóð

Aðalfundur SSA haldinn í Fjarðabyggð 13. og 14. september 2013 hvetur sveitarfélög á starfssvæði sambandsins til að ganga til samninga um nýjan atvinnuþróunarsjóð Austurlands sem staðsettur verði innan Austurbrúar. Samningur verði grundvallaður á þeim drögum sem unnin hafa verið innan stjórnar SSA, stjórnar núverandi Atvinnuþróunarsjóðs Austurlands og sem laganeftnd aðalfundar tók fyrir og hefur lagt fyrir fundinn með smávægilegum breytingum.

Aðalfundur veitir stjórn SSA heimild til að skipa bráðabirgðastjórn fyrir sjóðinn, náist samningar um stofnun hans, og til að ákveða framlag sveitarfélaga í hann fyrsta starfsárið. Skal það framlag vera í samræmi við það sem gerist um framlög í núverandi sjóð. Stjórn sjóðsins skal síðan kjörin samkvæmt ákvæðum samnings og framlaga sveitarfélaga í sjóðinn til næstu fjögurra ára verði síðan ákveðið á aðalfundi SSA 2014.

Samningur um Atvinnuþróunarsjóð Austurlands

Austurbrú ses kt. xxxxxx-xxxx, Samband sveitarfélaga á Austurlandi kt. xxxxxx-xxxx og sveitarfélögin Borgarfjarðarhreppur kt. xxxxxx-xxxx, Breiðdalshreppur kt. xxxxxx-xxxx, Djúpavogshreppur kt. xxxxxx-xxxx, Fjarðabyggð kt. xxxxxx-xxxx, Fljótsdalshérað kt. xxxxxx-xxxx, Fljótsdalshreppur kt. xxxxxx-xxxx, Seyðisfjarðarkaupstaður kt. xxxxxx-xxxx og Vopnafjarðarhreppur kt. xxxxxx-xxxx, gera með sér eftirfarandi samkomulag um starfsemi atvinnuþróunarsjóðs fyrir Austurland.

I. kafli Markmið samningsins

1. grein

Ofangreindir aðilar samningsins sameinast um að til verði sjóður sem styrki og veiti fjármagn til atvinnuuppbyggingar á starfssvæði SSA. Sjóðurinn taki við hlutverki og eignum Atvinnuþróunarsjóðs Austurlands við niðurlagningu hans. Tilgangur sjóðsins er að stuðla að þróun og eflingu atvinnulífs á Austurlandi.

II. kafli Hlutverk og skyldur samningsaðila

2. grein

Austurbrú varðveitir sjóðinn og skal hann vera hluti af stofnuninni en sérgreindur í ársreikningi Austurbrúar. Starfsmenn Austurbrúar skulu halda utan um sjóðinn og úthlutanir úr honum samkvæmt nánari ákvæðum samnings þessa. Framkvæmdastjóri Austurbrúar tilnefnir starfsmann eða starfsmenn þá sem halda utan um sjóðinn, boða til stjórnarfunda, auglýsa úthlutanir samkvæmt ákvörðun stjórnar atvinnuþróunarsjóðs, leiðbeina umsækjendum, taka við umsóknum, meta þær og gera tillögur um úthlutun samkvæmt verklags- og úthlutunarreglum sjóðsins.

3. grein

Sveitarfélögin sem eru aðilar að samningi þessum skuldbinda sig hvert og eitt til að greiða árlegt framlag til sjóðsins. Skal framlagið vera ákveðin krónutala á hvern íbúa í sveitarfélaginu og gilda í fjögur ár í senn. Krónutala skal ákveðin á aðalfundi SSA, en taka breytingum um hver áramót í samræmi við hækkan byggingarvísitölu Hagstofu Íslands í desember.

4. grein

SSA kemur fram fyrir hönd sveitarfélaganna gagnvart sjóðnum samkvæmt nánari ákvæðum samnings þessa. Fjórir stjórnarmenn í Atvinnuþróunarsjóði skulu kosnir til fjögurra ára, einn á hverjum aðalfundi

47. aðalfundur SSA haldinn í Fjarðabyggð 13. og 14. september 2013

SSA. Fimmti fulltrúinn, svokallaður flakkari skal SSA skal kosinn til eins árs í senn.

III. kafli Hlutverk og starfsemi sjóðsins

5. grein

Sjóðurinn skal ná tilgangi sínum með eftirfarandi hætti:

- a) Úthlutun styrkja til að mæta kostnaði við sérfræðivinnu, sérstakar athuganir, rannsóknir og aðra upplýsingaöflun sem ætlað er að nýta við könnun á grundvelli fyrir nýjungum í atvinnustarfsemi á Austurlandi.
- b) Kaupum á hlutafé í nýjum fyrirtækjum sem stofnuð eru til að hafa með höndum starfsemi sem telja má til nýsköpunar í atvinnulífi á Austurlandi. Með nýjum fyrirtækjum er átt við fyrirtæki sem starfað hafa í skemmri tíma en tvö ár.
- c) Lánveitingum til reksturs nýrra fyrirtækja á þróunartíma þeirra sem miða skal við að sé þrjú ár frá stofndegi, til vöruþróunarverkefna starfandi fyrirtækja, til markaðssetningar á nýjum vörum og markaðsaðgerða sem miða að því að afla nýrra markaða fyrir austfirskar vörur og þjónustu og til öflunar á sérþekkingu sem nauðsynleg er vegna nýrrar starfsemi hjá fyrirtækjum.

6. grein

Kostnaður vegna umsýslu Austurbrúar með sjóðnum skal greiddur úr honum. Skal umsýslugjald þó aldrei vera hærra en sem nemur 20% af árlegu framlagi í sjóðinn.

7. grein

Stjórn Atvinnuþróunarsjóðs er heimilt, samkvæmt tillögu Austurbrúar, stjórnar SSA eða að eigin frumkvæði, að ákveða að taka úr sjóðnum árlega sem nemur allt að heildarframlagi ársins, að fráðregnum umsýslukostnaði, og ráðstafa í tiltekið verkefni eða starfsemi á sviði atvinnumála, þróunar, markaðs-, fræðslu- eða upplýsingamála innan starfssvæðis SSA. Skilyrði er að verkefnið nái yfir stóran hluta af starfssvæði SSA og að ætla megi að það gagnist umtalsverðum fjölda fyrirtækja eða almennri uppbyggingu atvinnulífs á stórum hluta svæðisins.

8. grein

Stjórn Atvinnuþróunarsjóðs skal, í samráði við stjórn SSA setja verklags- og úthlutunarreglur fyrir sjóðinn. Drög að slíkum reglum skulu unnin af Austurbrú og lögð fyrir stjórn sjóðsins sem sendi þau til umsagnar stjórnar SSA.

Verklags og úthlutunarreglur skulu m.a. innihalda eftirfarandi atriði.

- a) Skilgreining á áherslum sjóðsins og leiðbeiningar til umsækjenda.
- b) Kalla skuli að jafnaði einu sinni á ári eftir umsóknum í sjóðinn, sbr. þó 7. gr. samningsins.

9. grein

Í reglum sjóðsins skal koma fram að fyrirgreiðsla úr sjóðnum sé háð því að verkefnin séu sannarlega vistuð innan þeirra sveitarfélaga sem greiða í sjóðinn. Stjórn Atvinnuþróunarsjóðs er þó heimilt að víkja frá þessum skilyrði þyki þau ekki eiga við.

Einnig er heimilt að gera að skilyrði fyrir fyrirgreiðslu úr sjóðnum að styrkþegi sé skuldlaus aðili að Austurbrú eða SSA eftir því sem við á.

IV. kafli Gildistími og uppsögn

10. grein

Samningur þessi tekur gildi við undirritun og er ótímabundinn. Aðilum hans er heimilt að segja samningnum upp með bréfi til annarra samningsaðila með árs fyrirvara, þannig að uppsögn sem berst fyrir áramót, taki endanlega gildi næstu áramót þar á eftir.

V. kafli Önnur ákvæði

11. grein

Óski einhver samningsaðila eftir því að boðaður verði fundur fulltrúa samningsaðila til að ræða málefni

sem honum tengjast skal beiðni um slíkt beint til stjórnar SSA sem skal boða til fundarins þannig að hann verði haldinn innan mánaðar.

20.3. ERINDISBRÉF SAMGÖNGUNEFNDAR SAMBANDS SVEITARFÉLAGA Á AUSTURLANDI

1. gr.

Samgöngunefnd SSA er skipuð af aðalfundi Sambands sveitarfélaga á Austurlandi, heyrir undir stjórn SSA og fer með þau málefni sem tengjast samgöngum og til umfjöllunar eru á vegum samtakanna.

2. gr.

Samgöngunefndin skal skipuð einum fulltrúa frá hverju sveitarfélagi og einum til vara. Gætt skal að jöfnu kynjahlutfalli við skipan nefndar. Nefndin kys sér sjálf formann í upphafi starfsárs. Formaður stjórnar SSA hefur seturétt á fundum nefndarinnar með málfrelsi og tillögurétt.

3. gr.

Hlutverk samgöngunefndar er að móta tillögur að samræmdri samgönguáætlun fyrir Austurland. Skal hún í því skyni vinna að öflun upplýsinga um samgöngumál og grundvalla tillögur sínar á málefnalegum undirbúningi. Þá skal nefndin vinna að framgangi tillagna aðalfundar SSA í samgöngumálum, eiga samskipti við og afla upplýsinga frá samgönguyfirvöldum um stöðu áætlana og verkefna í samgöngumálum í fjórðungnum, vinna að öðrum samgöngutengdum verkefnum sem stjórn SSA kann að vísa til nefndarinnar.

4. gr.

Samgöngunefnd skal árlega skila skýrslu til stjórnar SSA um störf nefndarinnar og tillögur. Skýrslan verður síðan til umfjöllunar á aðalfundi SSA.

5. gr.

Samgöngunefnd er stjórn SSA til ráðgjafar varðandi umsagnir um þingmál sem tengjast samgöngum.

6. gr.

Fulltrúi sveitarstjórnarmála hjá Austurbrú ses. starfar með samgöngunefndinni. Hann undirbýr og boðar fundina í samráði við formann. Hann situr fundi nefndarinnar og hefur þar málfrelsi og tillögurétt.

7. gr.

Nefndin heldur fundi þegar verkefni liggja fyrir en þó eigi sjaldnar en þrisvar sinnum á ári. Skylt er að boða til fundar ef meirihluti aðalmanna í samgöngunefnd æskir þess.

8. gr.

Til fundar telst löglega boðað hafi allir nefndarmenn eða varamenn í forföllum aðalmanna svo og aðrir sem seturétt eiga á fundinum verið boðaðir með a.m.k. tveggja sólarhringa fyrirvara og þeim jafnframt greint frá dagskrá fundarins. Að jafnaði skal boðað til funda með skriflegu fundarboði/tölvupósti og því skal að jafnaði fylgja afrit þeirra erinda sem til umfjöllunar eru.

Komi upp mál sem krefst skjótrar úrlausnar samgöngunefndar getur fyrirvari um fundarboðun verið skemmri.

9. gr.

Fundargerðir samgöngunefndar skulu lagðar fyrir stjórn SSA og staðfestar af henni.

10. gr.

Samgöngunefnd getur enga samþykkt eða ályktun gert nema meirihluti hennar sitji fund. Tillaga fellur á jöfnum atkvæðum. Formlegum tillögum og ályktunum nefndarinnar skal ætíð beint til stjórnar eða aðalfundar SSA.

11. gr.

Rita skal fundargerðir nefndarinnar í sérstaka fundargerðarbók eða tölvuskrá þær skv. sveitarstjórnarlögum. Í fundargerð skal skrá hvar og hvenær fundir eru haldnir og hvenær þeim er slitið. Allar tillögur sem fram eru bornar skulu skráðar svo og samþykktir og ályktanir samgöngunefndar og skulu allir viðstaddir undirrita fundargerðina.

12. gr.

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnsýslulögum nr. 37/1993 og samþykktum SSA.

20.4 ERINDISBRÉF SAMSTARFSNEFNDAR SAMBANDS SVEITARFÉLAGA Á AUSTURLANDI

1. gr.

Samstarfsnefnd SSA er skipuð af aðalfundi Sambands sveitarfélaga á Austurlandi, heyrir undir stjórn SSA og fer með þau málefni sem tengjast samstarfsverkefnum sveitarfélaga á Austurlandi sem aðalfundur SSA eða stjórn SSA vísa til nefndarinnar til umfjöllunar.

2. gr.

Samstarfsnefndin skal skipuð einum fulltrúa frá hverju sveitarfélagi og einum til vara. Gætt skal að jöfnu kynjahlutfalli við skipan nefndar. Nefndin kys sér sjálf formann í upphafi starfsárs. Formaður stjórnar SSA hefur seturétt á fundum nefndarinnar með málfrelsi og tillögurétt.

3. gr.

Hlutverk Samstarfsnefndarinnar er meðal annars:

- Greina og vinna áfram að frekara samstarfi allra sveitarfélaga á starfssvæði SSA um einstök verkefni og málaflokka.

- Greina og vinna að verkefnaflutningi frá ríki til sveitarfélaga, með það í huga að sveitarfélögin á starfssvæði SSA leysi þau í sameiningu.

- Önnur samstarfsverkefni sem stjórn SSA kann að vísa til nefndarinnar.

4. gr.

Samstarfsnefnd skal árlega skila skýrslu til stjórnar SSA um störf nefndarinnar og tillögur. Skýrslan verður síðan til umfjöllunar á aðalfundi SSA.

5. gr.

Fulltrúi sveitarstjórnarmála hjá Austurbrú ses. starfar með samstarfsnefndinni. Hann undirbýr og boðar fundina í samráði við formann. Hann situr fundi nefndarinnar og hefur þar málfrelsi og tillögurétt.

6. gr.

Nefndin heldur fundi þegar verkefni liggja fyrir en þó eigi sjaldnar en þrisvar sinnum á ári. Skylt er að boða til fundar ef meirihluti aðalmanna í samstarfsnefndar æskir þess.

7. gr.

Til fundar telst löglega boðað hafi allir nefndarmenn eða varamenn í forföllum aðalmanna svo og aðrir sem seturétt eiga á fundinum verið boðaðir með a.m.k. tveggja sólarhringa fyrirvara og þeim jafnframt greint frá dagskrá fundarins. Að jafnaði skal boðað til funda með skriflegu fundarboði/tölvupósti og því skal að jafnaði fylgja afrit þeirra erinda sem til umfjöllunar eru.

8. gr.

Fundargerðir samstarfsnefndar skulu lagðar fyrir stjórn SSA og staðfestar af henni.

9. gr.

Samstarfsnefnd getur enga samþykkt eða ályktun gert nema meirihluti hennar sitji fund. Tillaga fellur á jöfnum atkvæðum. Formlegum tillögum og ályktunum nefndarinnar skal ætíð beint til stjórnar eða aðalfundar SSA.

10. gr.

Rita skal fundargerðir nefndarinnar í sérstaka fundargerðarbók eða tölvuskrá þær skv. sveitarstjórnarlögum. Í fundargerð skal skrá hvar og hvenær fundir eru haldnir og hvenær þeim er slitið. Allar tillögur sem fram eru bornar skulu skráðar svo og samþykktir og ályktanir samstarfsnefndar og skulu allir viðstaddir undirrita fundargerðina.

11. gr.

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnsýslulögum nr. 37/1993 og samþykktum SSA.

Til máls tók Arnbjörg Sveinsdóttir.

Þingskjal nr. 17 borið fram í heild sinni og samþykkt samhljóða.

21. Samgöngu- og umhverfisnefnd

Gunnþórunn Ingólfssdóttir hópstjóri flutti framsögu. Þingskjal nr. 18

Tillögur samgöngu- og umhverfisnefndar

21.1. Jarðgangagerð

Aðalfundur SSA haldinn í Fjarðabyggð 13. – 14. sept. 2013 telur mikilvægt að jafnhliða gerð Norðfjarðarganga verði hafist handa við undirbúning á næstu göngum sem verði undir Fjarðarheiði, þannig að framkvæmdir geti hafist í beinu framhaldi af Norðfjarðagöngum. Þá verði hafnar rannsóknir og frekari undirbúningur á næstu göngum þar á eftir þ.e. milli Vopnafjarðar og Fljótsdalshéraðs, undir Lónsheiði og metnir kostir frekari tenginga milli byggðarlaga á Austurlandi. Fundurinn leggur áherslu á að jarðgangagerð verði fjármögnuð með sérstökum hætti þannig að aðrar mikilvægar framkvæmdir í samgöngumálum fjórðungsins dragist ekki sökum fjárskorts.

21.2. Nýframkvæmdir í vegagerð

Aðalfundur SSA haldinn í Fjarðabyggð 13. – 14. sept. 2013 leggur þunga áherslu á að uppbygging heilsársvegur um Öxi sé í forgangi vegagerðar á Austurlandi og framkvæmdir hefjist þar sem fyrst. Heilsársvegur um Öxi er brýnasta framkvæmd í vegagerð á Austurlandi að mati fundarins. Mikilvægt er því að koma framkvæmdinni í gang strax á árinu 2015 með verklokum eigi síðar en 2018. Mikilvægt er að með nýframkvæmd um Axarveg verði í sameiginlegu útboði leyst tvö brýn samgönguverkefni á Þjóðvegi 1 sem eru órjúfanlegir hlutar Axarvegur þ.e. í botn Skriðdals og Berufjarðar. Jafnframt er brýnt að sinna helstu framkvæmdum s.s. að ljúka lagningu slitlags á Borgarfjarðarvegi, Þjóðveg um Breiðdal, veginn um Jökulsárhlíð, Upphéraðsveg um Fell og efra Jökuldal og endurbyggingu á vegköflum um Suðurfjarðarveg.

21.3. Viðhald vega

Aðalfundur SSA haldinn í Fjarðabyggð 13. – 14. sept. 2013 skorar á Alþingi að veita mun meira fjármagni til viðhalds vega, þ.m.t. Þjóðvega í þéttbýli og vetrarþjónustu í fjórðungnum.

21.4. Brýr

Aðalfundur SSA haldinn í Fjarðabyggð 13. – 14. sept. 2013 telur nauðsynlegt að ráðast í átak til að fækka einbreiðum brúm, en á Austurlandi að finna stóran hluta einbreiðra brúa sem enn eru á Þjóðvegi nr. 1 auk fjölmargra annarra og hefur fjórðungurinn verið látinn sitja verulega á hakanum þegar kemur að endurnýjun brúa.

Í ljósi ástands Lagarfljótsbrúar telur fundurinn að það þoli enga bið að finna nýrri Lagarfljótsbrú við Egilsstaði, stað í samgönguáætlun

21.5. Almenningsamgöngur

Aðalfundur SSA haldinn í Fjarðabyggð 13. – 14. sept. 2013 fagnar þeirri vinnu sem farið hefur fram í heildstæðu skipulagi almenningsamgangna á landsvísu. Fundurinn telur mikilvægt að til þess að almenningsamgöngur verði raunhæfur valkostur á landsbyggðinni þurfi að auka verulega fjármagn til þeirra líkt og gert hefur verið á höfuðborgarsvæðinu. Þá er það mat fundarins að ef lagaumhverfi sem almenningsamgöngur búa við í dag verður ekki breytt þannig að þær fái skýrt lagalegt umboð til sérleyfisaksturs, sé ekki réttlætanlegt að landshlutasamtök sveitarfélaga komi að slíkum rekstri.

21.6. Egilsstaðaflugvöllur

Aðalfundur SSA haldinn í Fjarðabyggð 13 – 14 sept. 2013 fagnar því fjármagni sem kom í gegnum Sóknaráætlun Austurlands kr. 10.0 milljónir til markaðssetningar Egilsstaðaflugvallar og telur mikilvægt að framhald verði á verkefninu. Þá hvetur fundurinn Austurbrú til að vinna að því að krafti að koma á millilandaflugi um Egilsstaðaflugvöll. Fundurinn telur að Egilsstaðaflugvöllur sé tiltölulega vel útbúinn til þess að taka við millilandaflugi. Nú þegar ferðamönnum fjölgar mikið og álag á Keflavíkurflugvöll er komið að þolmörkum er mikilvægt að nýta þá góðu aðstöðu sem til staðar er á Egilsstaðaflugvelli. Ráðast þarf í ákveðnar úrbætur við Egilsstaðaflugvöll svo hann geti þjónustað millilandaflug betur. Þar má nefna stækkun á flughlaði til að auka öryggi flugvallarins og notkun hans. Þá þarf áfram að tryggja framkvæmda- og rekstrarfé til flugvallarins þannig að hann geti staðið undir auknu álagi.

21.7. Innanlandsflug

Aðalfundur SSA haldinn í Fjarðabyggð 13. – 14. sept. 2013 leggur áherslu á mikilvægi innanlandsflugs og í því sambandi er lögð áhersla á að áfram verði áætlunarflug til Vopnafjarðar með tengiflugi við Akureyri og nægjanlegu fjármagni sé veitt til endurnýjunar lendingarljósa og annara flugleiðsögutækja sem eru komin til ára sinna. Flugvelli í grunnneti á svæði SSA eru tveir þ.e. Egilsstaðaflugvöllur og Vopnafjarðarflugvöllur sem einungis þjónar innanlandsflugi. Flug er eini almenningssamgöngumátinn til og frá Vopnafirði. Lagt er til að engar breytingar verði gerðar á grunnnetinu hvað þetta mál varðar.

Fundurinn leggur áherslu á mikilvægi þess að Norðfjarðarflugvöllur verði lagður bundnu slitlagi þannig að hann megi þjóna sjúkraflugi sem best. Fundurinn lýsir yfir þakklæti til þeirra fyrirtækja og einstaklinga sem beittu sér fyrir söfnun og uppsetningu á brautarlýsingu á Norðfjarðarflugvelli. Flugvöllurinn er nú betur í stakk búinn en áður að sinna öryggishlutverki sjúkraflugs fyrir Fjórðungssjúkrahúsið í Neskaupsstað.

Þá er skorað á Ríkistjórn Íslands að setja á fót starfshóp með aðkomu landshlutasamtakana sem fari yfir verðlagningu á innanlandsflugi.

21.8. Þyrlusveit á Austurlandi

Aðalfundur SSA haldinn í Fjarðabyggð 13. – 14. sept. 2013 leggur áherslu á að unnið verði að því að aðstaða og hluti útgerðar þyrlusveitar Landhelgisgæslunnar verði á Egilsstaðaflugvelli. Einnig verði tryggt að Egilsstaðaflugvöllur verði notaður sem flugmiðstöð vegna starfsemi sem tengd er hugsanlegri olíuleit á Drekasvæðinu, samanber tillögur sérferðinga þar um (Þjónustumiðstöð við olíuleit á Drekasvæði-Aðstöðusköpun og staðarval, Iðnaðarráðuneytið, Langesbyggð og Vopnafjarðarhreppur 2008).

21.9. Reykjavíkurflugvöllur

Aðalfundur SSA haldinn í Fjarðabyggð 13. – 14. sept. 2013 mótmælir harðlega þeim áformum að flugvöllurinn í Reykjavík verði fluttur úr Vatnsmýrinni og skorar á borgaryfirvöld og Alþingi að tryggja að flugsamgöngur við Reykjavík verði óbreyttar. Slíkt er alger forsenda fyrir íbúa þessa lands hvort sem litið er til sjúkraflugs, stjórnsýslu eða annarrar þjónustu sem í boði er í höfuðborg landsins alls.

Sveitarfélögin á starfssvæði SSA hafa margoft bent á þau neikvæðu áhrif sem það hefði á landsbyggðina ef miðstöð innanlandsflugs yrði flutt úr Reykjavík. Verði af því hlýtur ríkisvaldið að endurskoða uppbyggingu á opinberri þjónustu á höfuðborgarsvæðinu til að mæta þeim áhrifum sem slíkt hefði í för með sér fyrir landið allt.

Nýlegar kannanir um staðsetningu innanlandsflugs á höfuðborgarsvæðinu, sýna eindreginn vilja almennings til þess að flugvöllurinn verði áfram staðsettur í Vatnsmýrinni. Fundurinn hvetur borgarstjórn Reykjavíkur til að taka tillit til þess vilja og þarfa landsbyggðarinnar að góðu aðgengi að höfuðborg Íslands.

21.10. Hafnir

Aðalfundur SSA haldinn í Fjarðabyggð 13. – 14. sept. 2013 lýsir ánægju sinni með þá ákvörðun skipafélaganna að hefja strandsiglingar að nýju. Strandsiglingar skapa fyrirtækjum á landsbyggðinni aukna möguleika á inn- og útflutningi og auka tækifæri hafna til að markaðsetja sig. Aðalfundurinn leggur áherslu á að haldið verði áfram að styrkja hafnarframkvæmdir í samræmi við hljóðan 24.gr. hafnarlaga og að við endurskoðun laganna verði tekið tillit til mikilvægi þess að auk nýframkvæmda taki þau til meiriháttar viðhalds hafna.

21.11. Skemmtiferðaskip - ferjur

Aðalfundur SSA haldinn í Fjarðabyggð 13. – 14. sept. 2013 telur mikilvægt að sveitarfélög í fjórðungnum vinni saman og hafi samráð um markaðsetningu og móttöku skemmtiferðaskipa og tryggi um leið að kröftunum verði ekki dreift of víða. Mikilvægt er að nýta uppbyggingu ferjuhafnar á Seyðisfirði og byggja undir reynslu og þekkingu sem þar hefur skapast á móttöku ferju- og skemmtiferðaskipa með því að markaðssetja aðstöðuna sem helstu ferju- og skemmtiferðaskipahöfn Austurlands.

21.12. Fjarskipti

Aðalfundur SSA haldinn í Fjarðabyggð 13. – 14. sept. 2013 fagnar því framtaki Símans að tengja bæjarfélög á Austurlandi ljósnetinu. Fundurinn telur mikilvægt að við slíka framkvæmd verði allir þéttbýliskjarnar á Austurlandi stórir sem smáir tengdir ljósnetinu í átaki Símans og dreifbýlum svæðum sinnt á sama máta og þéttbýli varðandi möguleika á háhraðatengingum. Fundurinn leggur áherslu á það sanngirnismál að allir íbúar landsins hvort sem þeir búa í þéttbýli eða dreifbýli eigi kost á háhraðatengingu sem stenst nútímakröfur.

21.13. Fráveitumál.

Aðalfundur SSA haldinn í Fjarðabyggð 13. og 14. Sept. 2013 telur að fráveitumál, ásamt málefnum úrgangs, séu eitt mikilvægasta umhverfismál sveitarfélaga. Aðalfundur hvetur aðildarsveitarfélög SSA og HAUST til að vinna markvisst að úrbótum í fráveitumálum er skorað á ríkisstjórn landsins að koma aftur á styrkjum svipuðum þeim sem fráveitunefnd veitti til ársins 2008 og einnig að endurskoða kröfur sem gerðar eru til hreinsunar skólps.

21.14. Lífrænn úrgangur

Aðalfundur SSA haldinn í Fjarðabyggð 13. – 14. sept. 2013 leggur til við SSA að hafin verði vinna við að leita sameiginlegra lausna varðandi lífrænan úrgang sem fellur til á starfssvæðinu með það að markmiði að draga úr kostnaði og um leið reyna að hámarka nýtingu þess úrgangs sem fellur til frá heimilum og fyrirtækjum.

21.15. Stuðningur við uppbyggingu á friðlýstum svæðum

Aðalfundur SSA haldinn í Fjarðabyggð 13. – 14. sept. 2013 áréttar að umsjón og eftirlit með friðlýstum svæðum sé að öllu jöfnu best fyrirkomið hjá aðilum heima í héraði. SSA hvetur jafnframt ríkisvaldið til að leggja til mun meiri fjármuni til uppbyggingar á friðlýstum svæðum, þannig að sveitarfélög sjái sér í ríkara mæli hag til þess að taka að sér umsjá og rekstur slíkra svæða.

21.16. Tvö mikilvæg samgönguverkefni

Aðalfundur SSA haldinn í Fjarðabyggð 13. – 14. september 2013 lýsir yfir mikilli ánægju með tvö mikilvæg samgönguverkefni á Austurlandi sem unnið hefur verið að. Á haustdögum 2013 er þess að vænta að nýbyggingu vegar um Vopnafjarðarheiði verði lokið og hafin gerð Norðfjarðarganga, hvoru tveggja langþráðar samgöngubætur.

Björn Ingimarsson óskaði eftir að ályktun um legu þjóðveg nr. 1 yrði sett á dagskrá.

Ályktun um legu þjóðveg nr. 1 – Þingskjal nr. 19

Aðalfundur SSA haldinn í Fjarðabyggð 13. og 14. september 2013 beinir því til Vegagerðarinnar að fram fari mat á legu þjóðveg nr. 1 um Austurland með tilliti til ýmissa samfélagsþátta, svo sem vetrarþjónustu, öryggis og ferðatíma. Jafnframt er óskað eftir því að niðurstöður matsins verði kynntar Samgöngunefnd SSA sem fyrst.

Flutningsmenn Björn Ingimarsson og Páll Björgvin Guðmundsson.

Fundurinn samþykkir með meginþorra atkvæða að taka ályktun um legu þjóðveg nr. 1 á dagskrá – 2 á móti (Fulltrúar Djúpavogshrepps)

Guðrún Katrín Árnadóttir - Breytingartillaga við ályktun 21.1. jarðgangagerð.

Leggur til orðalagsbreytingu á 5.línu í ályktun 21.1. „.....kostir frekari tenginga milli byggðarlaga á Mið - Austurlandi“

Páll Baldursson – styður ályktun um þjóðveg 1.

Eiður Ragnarsson – ræddi verðlagning á innanlandsflugi.

Vilhjálmur Jónsson – Breytingartillaga við ályktun 21.11. um skemmtiferðaskip og ferjur.
Í stað orðanna „...og hafi samráð um“ komi orðið „að“

Jakob Sigurðsson – Leggur til að ályktun 21.1. jarðgangagerð, eigi að vera óbreytt þar sem „Mið-Austurland“ útiloki Borgarfjörð eystri.

Guðrún Katrín Árnadóttir - Telur ekki að tillaga um að bæða við „Mið – Austurland“ sé að útiloka Borgarfjörð eystri.

Stefán Bogi Sveinsson – Tekur undir með Guðrúnu Katrínu en telur engu að síður að „Mið-Austurland“ eigi ekki heima í orðalagi tillögunnar.

Ályktanir í þingskjali 18 samþykkar samhljóða utan ályktanir 21.1. og 21.11. sem bornar voru upp sérstaklega.

Ályktun 21.1. Jarðgangagerð.

Breytingartillaga Guðrúnar Katrínar um að bæta við orðinu „Mið“ fyrir framan orðið Austurland í 5.línu, felld með meginþorra atkvæða.

Ályktun 21.1. um jarðgangagerð samþykkt samhljóða.

Breytingartillaga Vilhjálms við ályktun 21.11. samþykkt samhljóða.

Ályktun 21.11. um skemmtiferðaskip og ferjur, samþykkt samhljóða.

Þingskjal 19 - Lega þjóðveg 1 – samþykkt með meginþorra atkvæða – 2 á móti.

22. Kosningar samkvæmt samþykktum SSA.

Formaður kjörnefndar Arnbjörg Sveinsdóttir flutti framsögu. Þingskjal nr. 20.

Tillögur kjörnefndar til aðalfundar SSA í Fjarðabyggð 13. og 14. september 2013:

Error! Not a valid link.

Tillaga samþykkt með lófaklappi.

23. Fundarslit

Þorsteinn Steinsson tók til máls og bauð Vopnafjörð fram sem næsta fundarstað fyrir aðalfund SSA 2014 Valdimar O. Hermannsson þakkaði fundarmönnum fyrir góðan fund, Ólafi Áka Ragnarssyni og starfsmönnum Austurbrúar og sérstaklega heimasveitarfélagi fyrir góða aðstöðu og starfsmönnum fundarins fyrir þeirra vinnu. Valdimar óskaði fundarmönnum einnig góðrar heimferðar.

Að því sögðu sleit Valdimar 47. aðalfundi SSA kl. 15:06.